

29. april 2010

UPA 2010/119

**Siusinaartumik pensionisiat pillugit Inatsisartut peqqussutaata  
allangortinneqarnissaa pillugu Inatsisartut peqqussutaa nr. xx, xx 2010-  
meersoq**

(Siusinaartumik pensionisiat annertussusaannik allannguut, toqusoqartillugu  
aningaasanik tunniussisarnerit atorunnaarsinneqarneri kiisalu oqaatsitigut  
erseqqissaanerit)

(Isumaginninnermut Naalackersuisumit saqqummiunneqartoq)

**pillugu**

**Ilaqtariinnermut Ataatsimiititaliap**

**ISUMALIUTISSIISSUTAA**

**Siunnersuutip aappassaaneerneqarnerani saqqummiunneqartoq**

Ilaqtariinnermut Ataatsimiititaliap suliarrinnermini ukuninnga inuttaqarpoq:

Inatsisartunut ilaasortaq Debora Kleist, Inuit Ataqtigiit  
Inatsisartunut ilaasortaq Jane Petersen, Inuit Ataqtigiit  
Inatsisartunut ilaasortaq Andreas Uldum, Demokraatit  
Inatsisartunut ilaasortaq Ruth Heilmann, Siumut  
Inatsisartunut ilaasortaq Knud Kristiansen, Atassut

Siunnersuut UKA 2010-mi ulloq 15. april 2010-mi siullermeerneqarnerani  
Ilaqtariinnermut Ataatsimiititaliap sukumiisumik misissorpaa.

**Siunnersuut pillugu**

Siusinaartumik pensionisialinnut annertussusiliinerup iluarsiivigineqarnissaat pillugu  
Naalackersuisunit kissaateqartoqarnera siunnersuummut tunngaviuvoq.

- 1) Annertussusiliinerit qaammammut 1000 kr.-inik qaffanneqarnissaat siunnersuutigineqarpoq.
- 2) Annertussusiliinerit akinut nalimmassarneqarnissaat siunnersuutigineqarpoq.
- 3) Taamatuttaaq siusinaartumik pensionisiallip pensionisiaqarsinnaatitaasup toqukkut qimagunnerata kingorna inooqataa/aapparisa qaammatini marlunni pisartagaqassasoq siunnersuutigineqarpoq.
- 4) Tamatuma saniatigut oqaatsitigut erseqqissaasoqarnissaa siunnersuutigineqarpoq.

Taamaalilluni siuliani allassimasutut allanguutissatut siunnersuutini sisamanik saqqummiussisoqarpoq.

### **Siunnersuutip tusarniaassutigineqarnera**

Siunnersuut susasaqartunut tusarniaassutigineqarsimanissaa naatsorsuutigineqarpoq.

### **Siunnersuummik siullermeerinnineq**

Siunnersuummik siullermeerineq ulloq 15. april 2010-mi ingerlaneqarpoq, matumani partiit naalackersuineramik suliaqartut Inatsisartunullu ilaasortat tamarmik siunnersuummut oqaaseqarnissamut periarfissaqarlutik.

### **Ilaqutariinnermut Ataatsimiititaliap oqaaseqaatai**

Siunnersuut nunatsinni siusinaartumik pensionisialinnut aningaasaqarnikkut pitsannorsaataasumik kinguneqassasoq siullermeerineri partiit oqaatigaat.

Siusinaartumik pensionisialinnut aningaasaqarnikkut pitsannoriaateqartitsinissaq pisariaqartinneqarlunilu pisariaqartoq illuatungeriit tamarmik isumaqatigaat. Aningaasatigulli pitsannorsaanaissaq qanoq annertutigissanersoq naalackersuiniikkut suliaqartunit isumaqatigiissutigineqanngilaq.

Siusinaartumik pensionisiallit sapinngisamik annertunerpaamik namminerlu piginnaasaq naapertorlugu suliffeqalersinnaanerannik kissaat Ilaqutariinnermut Ataatsimiititaliamit ataatsimut isigalugu tapersorneqarsinnaavoq. Tamanna pillugu siunnersuutip tamakkiisuunissaata malittarineqarnissaa Ilaqutariinnermut Ataatsimiititaliamit Naalackersuisunut inassutigissavaa.

### **Inassuteqaat:**

Ilaqutariinnermut Ataatsimiititaliami amerlanerussuteqartut Inuit Ataqatigiinneersut, Demokraatineersut Atassummeersullu siunnersuutip ilusimisut iluseqartup akuersissutigineqarnissaa inassutigaat, siusinaartumik soraarnerussutisiallit aningaasaqarnerinut tunngatillugu nukittorsaanissamik siunnersuut aningaasatigut

pisinnaasanut sanilliullugu naleqqussarneqarsimmata. Pensionit akinut ataavartumik nalimmassartuarneqarnissaannik siunnersuut imaqarmat amerlanerussuteqartut naammagisimaarpaat, taamaalilluni siusinnerusukkut pisarsimasutut pensionit ajorneruleratillu pisissutaasinnaanerat mangiarneqarsinnaajunaarmata.

Siusinaartumik soraarnerussutisialinnut pissutsit pitsaanerulernissaannut ullumikkorninngarnillu suliffeqarfinni akuunerulernissaannut nukinnik tamanik atorfissaqartitsiffiusuni amerlanerusunik suliniuteqarniarneq amerlanerussuteqartunit qilanaarineqarpoq.

Aningaasat pitsanngorsaatisatut siunnersuutigineqartut naammangitsut Ilaqutariinnermut Ataatsimiititaliami ikinnerussuteqartut Siumumeersut isumaqarput. Siusinaartumik pensionisiallit aningaasaqarnerannik siunnersuummit matumani pineqartumit annertunerusumik pitsanngorsaataasussamik aammalu tamatuma saniatigut siusinaartumik utoqqalinermilu pensionisialinnut annertussutsit akornanni aningaasaqarnikkut akuerineqarsinngitsumik assigiinngisitsinermit nalimmassaataasussamik Siumut UKA 2009-mi siunnersuummik ataatsimoortumik saqqummiussaqaareersoq Siumup tapersiinnerminut ilanngullugu oqaatigaa. Ataatsimut isigalugu siunnersuummi akinik nalimmassaaneq oqaatsigut erseqqissaanerit kiisalu toqusoqarnerata kingorna pensionisianik tunniussisarnissaq Siumumit taperserneqarsinnaapput, ataatsimulli isigalugu pitsanngoriaat naammangilaq aammalu Akileraartarnermut Atugarissaarnermullu Ataatsimiititaliarsuaq utaqqimaarneqassanani.

Taama naatsumik oqaaseqarluni siullermeerinermilu oqaatigineqartut innersuussutigalugit Ilaqutariinnermut Ataatsimiititaliap siunnersuut Inatsisartunut aappasaaniigassanngortippaa.

Debora Kleist  
Siulittaasoq

Jane Petersen

Andreas Uldum

Ruth Heilmann

Knud Kristiansen